

榮縣志卷三十四

藝文志

自班固漢書標藝文之目而後之作志者因之或以事傳或以人傳或以地傳其有關於得失之林藉資考鏡者無不備載他如遷客騷人寄情流覽後先題詠爲本地生色者亦爲編入其與人地毫無關涉摭拾傳會殊無取焉志藝文

宋文

與王庠書

蘓軾

軾啓遠家差人致書問安否輔以藥物眷意甚厚自二

榮縣志

卷三十四

藝文志

宋文

一

月二十五日至七月十三日凡一百三十餘日乃至水陸蓋萬餘里矣罪戾遠黜旣爲親友憂又使此兩人者跋涉萬里比其還家幾盡此歲此君愛我之過而重其罪也但喜比來侍奉多暇起居佳勝軾罪大責薄居此固宜無足言者瘴癘之邦僵仆者相屬於前然亦有以取之非寒暖失宜則饑飽過度苟不犯此者亦未遽病也若大期至固不可逃又非萬里南北之故矣以此居之泰然不煩深念前後所述文字皆有古作者風力大略能道意所欲言者孔子曰辭達而已矣辭至於達止矣不可以有加矣經說一篇誠哉是言也西漢以來以

文設科而文始衰自賈誼司馬遷其文已不逮先秦古
書況其下者文章猶爾况所謂道德者乎若所論周勃
則恐不然平勃未嘗一日忘漢陸賈爲之謀至矣彼視
祿產猶机上肉但將相和調則大計自定若如君言先
事經營則呂后覺悟誅平勃而漢亡矣軾少時好議論
古人既者涉世更變往往悔其言之過故樂以此告君
也儒者之病多空文而少實用賈誼陸贄之學殆不傳
於世老病且死獨欲以此教子弟豈意媼親中乃有王
郎乎三復來貺喜忭不已應舉者志於得而已今程試
文字千人一律考官亦厭之未必得也如君自信不回
必不爲時所棄也又况得失有命決不可移乎勉守所
學以卒遠業相見無期萬萬自重而已人還謹奉手啓
少謝萬一

與王庠一

軾啓二卒遠來承手書累幅問勞教誨憂愛備盡仍審
侍奉多暇起居萬福感慰深矣軾罪責至重上不忍誅
止竄嶺海感恩念咎之外不知其他來書開說過當非
親朋相愛保全之道悚息悚息寄示高文新詩詞氣比
舊益見奇偉粲然如珠貝溢目非獨鄉閭世不乏人爲
喜又幸珍材異產近出姻戚數日讀不釋手每執以告

榮

縣志

卷三十四

藝文志

宋文

二

人曰此吾家王郎之文也老朽廢學久矣近日尤不近
筆硯見少時所作文如隔世事他人文也足下猶欲使
議論其間是顧千里於伏櫪也軾少時本欲逃竄山林
父兄不許迫以婚宦故汨沒至今南遷以來便自處置
生事蕭然無一物大略似行腳僧也近日又苦痔疾呻
吟幾百日緣此斷葷血鹽酪日食淡麵一斤而已非獨
以愈疾實務自枯槁以求寂滅之樂耳初欲獨赴貶所
兒女輩涕泣求行故與幼子過一人來餘分寓許下浙
中散就衣食既不在目前便與之相忘如本無有也足
下過相愛乃遣萬里相問無狀自取既爲親友憂及又

榮

縣志

卷三十四

藝文志

宋文

三

使此兩人者蒙犯瘴霧崎嶇往來吾罪大矣寄遺藥物
并方皆此中無有芎尤奇味得日食以禦瘴也軾爲舊
患痔今頗發作外無他故不煩深念會晤無期惟萬萬
以時保練

二

軾啓前後所寄高文無不過目每見增歎但恨老拙無
以少答來貺又流落海隅不能少助聲名於當時然格
力自天要自有公論雖欲不顯揚不可得也程夫子尙
困場屋王賢良屈爲州縣皆造物有不可曉者海隅風
土不甚惡亦有佳山水而無佳寺院無士人無醫藥杜

門食淡不飲酒亦粗有味也目昏倦作書又此信發書極多不能詳盡察之察之

三

承示欲往黔南見黃魯直此古人所難若果爾真一段奇事也然足下久違親庭遠適更請熟慮今寫一書若果行卽攜去也

四

別紙累幅過當老病廢忘豈堪英俊如此責望也少年應科目時記錄名數沿革及題目等大略與近歲應舉者同耳亦有少節目文字才塵添後便被舉主取去今

榮

縣志

卷三十四

藝文志

宋文

四

日皆無有然亦無用也實無捷足必得之術但如君高材強力積學數年自有可得之道而其實皆命也但卑意欲少年爲學者每讀書皆作數過盡之書富如入海百貨皆有之人之精力不能兼收盡取但得其所欲求者耳故願學者每次作一意求之如欲求古人興亡治亂聖賢作用但作此意求之勿生餘念又別作一次求事迹故實典章文物之類亦如之他皆倣此此雖迂鈍而他日學成八面受敵與涉獵者不可同日而語也甚非速化之術可笑可笑

與王序書

某啓忝媿末未嘗修問左右又方得罪屏居敢望存
記及之專人遠來辱牋教累幅稱述過重慰勞加等幸
甚卽日履茲秋暑尊體何似某仕不知止臨老竄逐罪
垢增積玷汙親友足下昆仲曲敦風義萬里遣人問安
否此意何可忘書詞雅健陳義甚高但非不肖所當也
蜀粵相望天末何時會合臨書惘惘未審授任何地來
歲科詔佇聞竣擢以慰願望更乞若時自重人還奉啓
少謝萬一不宣

嘯臺摩崖記

榮州刺史李燾丹稜人

眞如崖穴峭深佳處未易目也半嶺有石角立或屋其

榮縣志

卷三十四

藝文志

宋文

五

上憑臨極空闊而棟宇迫隘弗稱因使榮德令增廣之
圖經謂此孫登嘯臺登隱河北不聞至蜀然古稱嘯獨
登善凡嘯者必稽焉雖假托亦宜况登不污魏晉於道
最高稽阮欲爲弟子且不可得其神遊八極之表復何
所不至區區限以方域則陋矣□隆興元年端午日

嘯臺

馮儼安岳人

嘯臺總一郡之勝而軒檻狹隘今有意升大之卒未暇
會戍期迫恐遂負此乃具糧用委榮德邑大夫趙汝乙
因故址改作延袤視今增三之一夫孫登隱居編草被
髮安肯遊此而眞如崖壁倚天巖實深杳景物不凡風

清月白鳥知其無如蘇門生者振鳳凰之音哉不然則又豈無諸葛輩人遊學其間抱膝者乎

龍洞

榮州刺史 李鼎漢

榮德紹熙之劇縣也地瘠民貧而賦不加少惟士風淳厚非他邑之所能儕寶祐甲寅鳳池李鼎漢承崇臺奏辟承乏茲邑于時薦經俶擾戶口狼籍凡事務從寬恕不爲苛刻故不得罪于巨室民安業次于逃曠者責焉丙辰之冬瓜期時至暇日來遊龍洞徙倚縱目以覽一時之勝有感于懷仰而嘆曰江山有緣他時若得經遊此郡與僚友故人乘閒載酒徘徊終日歎語疇昔豈不

榮

縣志

卷三十四

藝文志

宋文

六

偉哉因援筆以紀歲月云

知榮州謝表

州牧 李 劉

佐黔巫之東鄙將及代瓜守巴夔之南安濫叨符竹出幕十年之未久循牆三命之惟共冒象馬以牽江跨犍牂而入境皆知聖主清衷之一視故令愚臣白首以重來伏念臣殖學拙疎賦才膚淺耗精神於場屋得弗償勞疲筋力於塵埃衰不待老頃緣政府入總成均韓愈補苴奚益茫茫之墜鄭虔輶軻難陪袞袞之登久去國以奉祠辱起家而貳郡敢意三刀之夢蜀復令五月而渡瀘維今榮隱之邦實昔夜郎之境刀耕火種矛淅劍

炊歲計經常之租無六千斛郡仰斥鹵之羨止五百緡
比因刻木之化銷致辱前茅之根拔熏鼠不嫌於穹窒
奪牛反甚於蹊田凡昔畱州悉今送使無復升斗米之
貸存活介鱗縱得二千石之良終成狼狽豈其庸謬堪
此奉承伏遇陛下政在養民仁不遺遠雖蓬鬢雪皤之
戍萬里軫憂與長安日近之州同時竝命重念和義濮
庸之路未正紹熙替置之名三年弄印而印刑四單代
庖而庖竭砍兇削例不待張詠薦李旼之來拔滯振淹
蓋法藝祖用王明之意臣敢不謹身率物節用愛人且
飲冰茹蘖以自將勿爲義疚儻求牧與芻而不得甘罪

榮

縣志

卷三十四

藝文志

宋文

七

奚歸

賀黃運使除總領啓

李 劉

內躋郎省外總餉臺西賓出幕之十年遂專主席東漕
下車之三月盡總賦輿人歆錫命之蕃上恨用公之晚
恭惟某官器資凝遠業履端溫言行夙擇乎中庸名實
久孚於上下頃歲紅巾之變折衝白刃之間數進忠規
刈葵惟恐其放手縱無恩澤徙薪豈下於焦頭共推江
夏之無雙再試潁川之第一維駒維騏維駱暫紓苞栩
之飛如熊如羆如貔熟飽樵蘇之爨帝咨眾望僉曰公
宜王人下視於諸侯有嚴天節郎官上應於列宿肯歷

土山政令先庚而已孚軍民旁午以相賀田里愁恨歎
息久已周知財貨本末源流尤皆宿講皮不存則毛將
安附脣既亡則齒得無寒欲兵食兼足之沛然在制闔
同心而已爾既無閒秦越之肥瘠何難圖韓范之功名
某百無一能億或履中頃進總領甚稱之語蓋在咨諏
周爰之初茲聆除日之頒豈勝頓足之喜惟榮之歲租
無五千斛而使所月解近七萬緡昨賴管煎抱賣之贏
用補大科帶補之欠近困井遷之後難施箕斂之苛在
小郡官兵既多空腸而大司符移尙理虛額巧但施於
有麵窮莫甚於無錐與物爲春望公如歲今夕飲者恩
老子

榮

縣志

卷三十四

藝文志

宋文

八

明日按者法正累故人觀察急於賦刺史私於民頗哀

榮黎山洞門亭子記

魯

清邑進

天子幸亳社之明年是郡春不雨抵於仲夏士膏歇泉
脉絕時將往矣而耒耜尙停農憂且泣太守皇甫公自
咎曰天不雨將害吾民誰之罪歟我則職之未盡也聞
是山有神禱誠厥應如響乃洗心裡奠夙興命駕冒炎
毒履艱險躬禱于是山畔有洞蓋神靈之所宅也公曰
雨若足吾當樹亭於其門用答神庥越一日果雨又一
日告足民躍於野轉戚爲懽次年公被詔歸闕畱俸緡

五萬付郡牧之良者俾經費以構是歲夏四月亭成君子曰民憂而咎己公也禱神而立應誠也破俸而利民義也報神而不爽信也有是四者其賢守之尤者乎噫有斯人行斯道惜乎獨行於一郡耳俾施之於天下其利也何如哉

明文

祭兵部侍郎胡公仲常文

曾三省

嗚呼臣子於君弟子於師義等在三死生以之文皇靖難公致其命希道殉君公嗣其勁二百年來忠魂黯黯聖人歷服明詔痛焉曰修俎豆曰錄苗裔祖武孫謀善述善繼蜀有專祠向以祀方公出其門宜列於旁赫赫坤維視此正氣日月精光同流罔既公也伯夷弟亦叔齊世有褒美公其慰兮

榮縣建學奏議

富順主簿
攝榮縣事 李 清

天順元年七月十七日四川等處承宣布政使嘉定州榮縣謹奏爲移修學校事准儒學牒呈據舉人龔匯呈前事伏覩詔書內開凡軍民利病許諸人直言無隱欽此欽遵匯聞山川靈而文運昌學校新而賢才盛故嵩嶽降神周道復興此賢才之盛由於學校之新而文運之昌本乎山川之靈也明矣仰惟皇上復登大寶日月

榮

縣志

卷三十四

藝文志

明文

九

重光人神胥慶乃天下太平之福匯本草茅景泰四年
忝以易經中順天府鄉試第十三名肆惟天下之利莫
利於賢才之出軍民之病莫病於學校不修竊見滎縣
儒學地形下溼文廟庫陋堂齋狹小生員俱無號房有
司當爲而不顧師生欲爲而難能軍民之病於此甚焉
按志古學基負陰抱陽左近鳳鳴山右近滎王府城唐
宋學校在此泮池石像碑存山川靈秀地勢高明宜爲
國家興學成才禮祀聖賢之所蓋謂俎豆增輝衣冠出
色永爲軍民之利正在今日矣古進士題名記云滎雖
藩邸重鎮學凡三遷始得勝地今觀雁塔所題可見自

滎

縣志

三十四

藝文志

明文

十

古人才科目於斯爲盛伏望聖恩嘉念學校實天下之
大本乞勅有司於農隙之時倩在官人役移修儒學於
古基依式豎造文廟殿廡廚庫堂齋房舍以備祭祀其
府城係宋時封王之地有司於內修理號舍令生員就
彼宿食肄業以備科貢凡興造所需皆取用於有司務
在費不侵官力不損民因閒暇之功成久遠之計匪惟
聖賢神宇得其安而師生講習亦得其便將見已學者
遂仕進之心未學者發趨向之志科貢復隆於往昔文
章效用於當時人才輩出土習益彰而同游明倫彝倫
之宮牆者必思忠孝君親於萬萬世矣利病之情如此

匯直言無隱如此乞蒙備達具奏請示明降移修學校
便益縣司得此除行據七鄉里老人等審勘相同外緣
係移修事未敢擅便請具奏聞天順二年四月 日工
部力字三百六十三號勘合欽奉聖旨准行使司劄付
本州本縣一體欽遵施行者

文廟碑記

龔

匯邑舉人

皇天上帝既集大福大命昇帝王作元后作民父母成
皇極經世之主復斂大經大法昇吾夫子爲天地立心
爲民物立命成皇極經世之道吾夫子仰帝王爲君帝
王俯吾夫子爲師君任道統以立政師任道學以立教

榮

縣志

卷三十四

藝文志

明文

十一

政立而天地之心正教立而民物之命存故帝王興學
明道建廟報功蓋天理之至公至明人心之至仁至義
者洪惟國家至治馨香規模宏遠太祖高皇帝任君師
道統之極尊夫子嚴丁祭置臥碑設科貢大福大命由
此而集大經大法由此而全此榮縣廟學所由作焉榮
卽周南從化之國五山鍾秀四水環清洪武四年辛亥
歸附爲州仍第一山舊府治第五山建廟學九年改爲
縣天順丁丑裕陵復登大寶國人議廟學弗稱禮制奉
請仍縣第二山舊學基觀其形勢當鳳鳴龍游之間負
陰朝陽高明爽麗蓋天寶人文淵藪待後人顯揚於今

日歲戊寅玉音明降士林胥慶己卯春欽遵改建大興
工作時都御史石首汪浩以僉憲巡治給資經始庚辰
春明倫堂居仁由義齋成歲甲申欽惟皇上帝受命
紀元成化粵丁亥大成殿殿簷五間成戊子春聖師四
配像成辛卯秋東西廡一十四間成壬辰夏都司馬雲
作十哲像成甲午夏按察司僉憲江陵戴賓詣學謁廟
見其興作一十八載未備遂惓惓篤志給工費命訓導
陳源典史周志榮耆士趙昇同醫士袁景徽督厥工躬
臨榮王城命作古先賢文昌祠且委敘南經歷龔華治
邑計資費至冬邑人効義黝堊殿廷堂廡甃飭階墀成

榮

縣志

卷三十四

藝文志

明文

十二

乙未春櫺星門九閒廚庫戟門成既慶成山川生色城
市改觀徽號金輝袞章玉映義路禮門仁宅天爵晶晶
乎文昌之府國人賀曰聖賢神宇得其安師生講習得
其所是皆仰荷夫子陟降在天之靈乘國家文運氣化
之厚伏遇皇上駿命中興得戴僉憲祇承制旨惠我榮
中之德先是匯具啓大方伯姚江楊文琳憲長雲中郭
紀爲記至是諸大夫謂大功落成爾匯實歷其事直書
無隱匯再拜曰道貫三才爲儒理全萬物爲學帝用之
養賢以奉天王用之成才以濟世學建而君道知所先
廟建而師道知所本顧茲廟學維新必有大魁特奏出

應奎璧大福大命之期自此作興始凡同游門牆者必感發興起相與正心術欽依臥碑講求大經大法期於學際天人庶幾夙夜能爲第一等好人能成第一等好事追及先輩榮公佐武王成周家八百年之治竹王在漢征西南成安邊之策斯可以報我朝崇儒重道之懿而學校人才賴有光焉於戲天下無難爲之事特患不用心耳使懷利器爲民造福者皆如戴僉憲心存忠厚如華勤慎用心則有何盤根錯節之難此皆民情公論可書者匪敢僭言爲有司師儒者當念前日作始者難固難尤恐後日守成者難又難要必思其難圖其難惜

榮

縣志

卷三十四

藝文志

明文

十三

此一木一石皆斯民脂膏慎其風雨常加潤色底於永遠不壞復作宸奎閣安庋欽賜制書永爲皇極經世之寶此實諸大夫及匯致望有道君子於將來云 成化十一年三月

增修文廟記

邑令 郎 玉

成化己卯冬余宰榮仰見文廟宏敞聖像偉觀以榮爲蜀僻壤何爲而得此然兩廡儀門未成方議興工未暇究其由也越三月生員方正等告余曰榮在宋爲紹熙府元改爲州學校移置不一國朝初易爲縣立學城東隅制弗稱天順元年孝廉龔匯奏移縣治西百步卽宋

紹熙府故址也上允所請柰官斯土者若尹公士恭劉公清譚公源黃公充劉先生超曹先生釗亦皆致意然在任未久材木聚而復廢者幾次矣幸今教諭王先生永來茲暮教朝出區畫不一年而廟成規模高大欵制合宜往來者僉稱近所未有皆我先生力也恐日久泯其勞願祈一言以勒諸石余聞而嘆曰昔吾疑而未暇究者今已釋之矣夫學校所以明人倫聖人人倫之至也孔子之道亙萬古而不可易非以祀不祀爲輕重然必廟而祀之者欲民知所宗也且必於是居俊秀以育之蓋欲其成德達材以爲化民成俗之本也先生以此

榮

縣志

卷三十四

藝文志

明文

十四

爲務可謂知所本矣諸生樂育其中可不勉勉循循日進於學以求無負先生意乎是爲記 成化六年庚寅

三榮幕樊公清齋碑記

廣東右
叅議

伍

性

邑進士

予少讀禮記至祭法曰先王之制祭祀也法施於民則祀之以勞定國則祀之能禦大災則祀之能捍大患則祀之每掩卷太息曰殷哉典也有一於此未或弗祀兼有之斯惟艱哉旣長舉進士僉晉憲廉諸郡邑凡以左途入仕或爲邑幕者率多方射利便爲身圖間有稱能者亦惟趨走頤指爭先取憐於上焉耳民隱遑恤耶歲庚申予致政家食日與鄉父老子弟相樂以終天年時

或值邑吏催科警及雞犬父老曰焉得如清齋樊公者
幕吾邑令惟行禁惟止曷有是擾耶其法施於民有如
此者論城郭完固則曰匪我樊父倡議經畫而爲吾所
吾民其夷矣案堵曷有今耶其以勞定國有如此者談
及盜賊不覺泫然泣下曰昔我樊父在時吾徒日夕安
枕盜能憚我耶其能捍大患有如此者或值歲凶餓莩
菜色盈郊埜父老攜幼穉相泣於道曰樊父若在夫何
使我至於此極耶其能禦大災有如此者予聞之憮然
曰都有是哉其功德之在吾榮者更僕未易數也吾榮
弗祀焉非人心也焉可以爲邑噫嘻公之功德在人心

榮

縣志

卷三十四

藝文志

明文

十五

固不以吾榮祀不祀爲損益而吾榮不祀公則報功報
德之典不能無損也父老感泣思奮相率請於學告於
文廟立石於名宦以教萬世之爲邑者公先秦朝邑人
諱資字文質別號清齋云

四柏堂記

楊桂丹

邑舉人

物之榮悴每肖乎人若三槐之子孫紫荆之兄弟始終
符契無錙銖爽是豈偶然也哉蓋必有造物者默司之
矣三榮世家吳君天祿廷用少讀書林下以捷科自許
嘗夢坐一舍左右圖書几案甚具舍前置四柏有若學
館然者已而廷用屢試有司弗利遂以縣命領教社學

榮社凡七咸官與講地立學選童俊隸教之廷用學在泮宮之左萬壽之陽宋民故居也舊植四柏於外圃荒穢蒙翳與榛莽咸置於無用至是有司以故宅深僻徙而出之圃正列四柏於階下廷用居之儼然夢中境焉遂翦叢棘而封培之斂徑石而甃砌之重重如四車蓋張立庭前挺挺如四虬龍騰飛屋表足爲茲社壯觀噫人之出處不囿於數耶柏日益盛而公之徒日益眾冠童濟濟雲集門牆柏止於四而公之子亦符其數伯仲怡怡玉立庭下公旣循循開啓各因其材而諸子諸生爭自奮勵以期底於成視他生放逸怠惰訖無寸進者

榮

縣志

卷三十四

藝文志

明文

十六

萬萬不侔是亦柏之邁羣芳而森森獨秀也公亦儉白自持一飯一蔬一裘一葛環堵蕭然居之自若亶亶與諸生相對終日雖祁寒盛暑未嘗少易歷成化宏治二十餘年師道獨尊爲後學山斗視他學荒墮不守去治他術者大相遠甚是亦柏之傲歲寒而蒼蒼後凋也公養高不出顧徵勅何如其諸子學問日新文章日麗由茲社而升邑庠由邑庠而捷高科躋膺仕以柱石邦家是亦柏之銅柯日長雪幹日高由尋丈而十尺十圍可以棟大厦而柱明堂矣其或絕意功名放情邱壑亦不失爲賢人君子而與是柏同老風霜爲三榮之喬木矣

公之身之子之徒始終與是柏偕榮而竝盛如此亦奚異荆槐之於二氏乎予故以是名其堂而紀其異因請號曰四柏亦如古之五柳先生七松處士云

正德丁卯三月丙午日

熊侯去思碑

陳所達邑舉人

侯諱大輅字用商別號心齋世居湖廣之麻城由鄉薦拜榮邑令自下車省徭役課樹藝教民禮讓率以身先之如修理學校整飭祠宇忠耿祠之專祀養濟院之近移東郭建橋梁五門興場市演武亭東嶽廟之建禱雨壇武安公祠之祀助生員張榜之無糧鄒相之葬母儒士某某之婚嫁與夫舉人之故者趙可慶陳所敬生員

榮

縣志

卷三十四

藝文志

明文

前十七

之故者楊地維不時存問其親而餽遺焉嘗歲旱祈禱輒應故比年賴以無饑而境內大治屢膺旌獎之命侯之善政不止此奏績將赴銓曹時詣當道懇留者數百人弗遂所請皆泣而送出境且有護送抵家者一日父老輩以侯此去擬內升恐無復來榮思之不已乃相率構生祠塑肖像而祀之縣治西南之萬景樓誌不忘也屬余紀其事余謂世之貪酷以病齊民者伺其秩滿冀其昕夕速去之爲快安有去後之思如此哉必如詩所謂豈弟君子民之父母而後有以繫屬人心俾人感慕眷戀之切若甘棠之弗翦峴山之留碑是也榮人於侯

始而安其政去而懷其德久而祀其神是侯於召公羊叔子眞後先相望不僅如漢唐史所稱循良吏也行將陟崇階位台鼎以惠吾榮者惠天下而深仁厚澤又有爲天下後世所思慕者豈徒一邑而已哉

嘉靖二十二年歲次癸卯十一月吉旦

重修學宮記

給事 楊 鎔 邑人

夫子衍先聖之道脉開後學之薪傳自漢唐而下靡不建廟崇祀昭然與日月爭光迨我明興恢宏治理尊重師儒於是薄海內外咸知聖道之廣大而庠序之設俎豆之祀徧寰區矣榮昔周榮公封邑霑濡成周作人之化已深雖沿革不同而餘風尙在學宮故東關內邑舉

榮

縣志

卷三十四

藝文志

明文

後十七

人龔匯奉旨改建今百五十餘年殿宇堂廡相繼圯壞邑中大木軍餉連歲遞興不暇整飭以故傾倒益甚鎔與黃紀賢目擊而心動焉謂責在我輩乃商之齋長趙可師堯可近等倡率義舉莫不願與同事於是署縣斷事尹希孔知縣程梯咸謂此舉攸當各助有差乃鳩工程材計日興作殿之壞者易以杉楠瓦之傾者灌以油灰遷明倫堂於正殿側以接正脉啓聖祠列之於左名宦鄉賢二祠列之於右木料工役俱係新備稱煥然焉厥後請捐學租若干修建堂下左右書樓補砌兩廡竝石工等項則知縣馬應泰分理其事教諭羅青署學吳

惟中黃莪日督而責成之者也時堪輿家云泮池前宜有屏以聚其氣主簿楊進忠身任其事遂捐貲督工不日告成厥池久壞水涸典史趙文臣捐俸督修欄石豎緻可垂永久尊經閣傾壞有年知縣朱萬元捐金重建厥成可期而總理之責則又學博馮其原也功竟僉謂始事在鎔今落成不可無記鎔何敢以不文辭於戲盛世需材而育材在學賴諸公之力而學宮一新規模宏麗其育材之地可謂盛矣諸君之養育於斯也必人人奮發人人慎修使真材備出於吾庠由是登諸廊廟或爲棟梁之器或爲砥柱之勲忠義垂於不朽聲名重於

榮

縣志

卷三十四

藝文志

明文

十八

鄉邦豈不有光於義舉也哉雖然忠義無俟他求也吾邑先達胡公仲常者重綱常之義執不變之操清風亮節與霄壤俱存殆無愧於聖賢之學者也諸君俱榮產也宜以此自勗因勒諸貞珉期與諸君共相勉焉斯舉也費金三百有餘諸令及學博與鄉士夫十之五諸生十之三邑人攸助十之一贊襄者與督修者及司出納者例得并書助貲者繫之碑陰 萬曆二十二年甲午 奎星樓記 楊 鎔

學校之設古矣奎星樓古所未有也有自今樂侯始侯以己亥歲莅縣事謁廟訖目擊黌宮之傾頽殫財修葺

庚子冬復改建明倫堂啓聖宮及兩廡等處廟制一新
除革奸弊百廢具舉然而振作後學之心未已也癸卯
冬一日謂學博趙君吳君暨諸士子曰學之有宮所以
妥聖靈也顧前後左右罔非風氣所關今東西二巷四
顧空曠則地氣不聚意欲東豎一樓以壯東關之盛何
如僉曰善於是給貲廣地會財庀工規畫綜治不徐不
亟凡工料所需分毫皆俸金所餘竝不煩官民攸助是
以樓閣高聳周阿巖峻髹采煥然蔚爲偉觀其卓絕若
王公大人軒冕黼黻整齊嚴肅而不可狎也其靚潔若
烈士高人秉節貞亮尊嚴端正而不可犯也其翬飛則

榮

縣志

卷三十四

藝文志

明文

十九

矯然龍驤翩然鳳翥雄健俊快而不可羈也其變化則
霞飛雲斂陽舒陰慘倏忽更易而不可測也工成因名
曰奎星樓夫奎西方之宿十六星與璧相聯談天者類
曰奎璧主文章而圖書祕府也侯之名斯樓也豈不以
聖明在上丕振人文斯民生遂四境晏然諸士子躬際
昇平宜殫精竭力以究聖賢之蘊奧出爲文詞掇大魁
躋華要柱石巖廊覆庇民物庶幾有光於斯樓矣且侯
以海內文星光照榮庠文章德行爲一邑之表率諸士
得以依歸而諄諄惠化之意何可少負乎詩曰高山仰
止景行行止高山之可仰以喻盛德之可懷也景行之

可行以喻大道之可由也樂侯尙道崇教志在作人雖
瓜期已近而樂善不倦其盛德之可懷如此吾徒登斯
樓也西望山峰嶙峋峯嶺俯瞰池波蕩漾澄澈而山水
之間千姿萬態莫不呈技獻巧於几席之間是皆賢侯
之明賜觸目興思懷人感德殆與斯樓俱永矣若夫聖
人之道如日中然若大路人人可得而由之希賢希
聖希天皆吾儒分內事諸君尙其勉之是役也經始於
癸卯冬落成於甲辰春二月趙君嘉言吳君康民命生
員伍瓊等屬予爲文記其歲月至樓以楹計者若干廣
以尺計者若干崇以丈計者若干凡督工而宣力者例
得書名碑陰侯名繼國江西新建人于野其別號也
萬曆三十二年甲辰夏五月

尊經閣記

嘉定州牧 袁子讓 郴州人

三榮學址擅西蜀之奇所鍾毓英才川南人文稱獨步
也舊鎮以閣久就湮圯矣大中丞黃芳楠先生振興後
學首議恢復而直指李公力主其議檄下本道總憲蔡
公少參李公勅有司治其事議費出公帑無毫髮動民
閒不閱月而告成題曰尊經閣因其舊也邑大夫李君
喬嶽不謂予不文率其弟子員丐予一言爲記予惟尊
經有閣將地靈是憑文運是翊閣之所培植其功大而

榮

縣志

卷三十四

藝文志

明文

二十

閣惟尊經將使經之垂如江河注地明如日月行天閣之所昭揭其功尤大夫孔子以六經憲萬世也承天憲則因性作牖夫非天下之所謂獨尊而無上者與然而經至常也亦至同也常見常聞則土龍芻狗棄之共知共著則布帛菽粟賤之棄常則賈奇賤同則榜異將權謀捭闔歧分爲二而虛無二氏鼎立爲三至尊之謂何夫經自秦燼之後談辨僅見於白虎註疏大集於考亭而濂溪洛水之賢爲之後先而羽翼之諸賢後孔子而興豈不能標奇幟異以各成一尊而道之所域今古一揆則經所以常尊而同尊正不在奇與異也明興以明

榮

縣志

卷三十四

藝文志

明文

二十一

經科士士專一業家誦戶習經不可謂不尊士以明經起家朝而釋褐夕而垂紳尊經者不可謂不榮然而經待尊於人人遂竊尊於經是未知巍科膺仕祇國家所以尊尊經者經之所以尊不在是也經有體有用體之醞深用之發廣其真精可以鑄身其蘩苴可以治天下古有真尊經者身作韋弦抱其經術宇宙作錘鑪杼爲經世言語作文章垂爲經翼彼其視經我之經也不敢負經我之經也竝不敢負我學問有獨注則德性有常尊身居可塞可通之途心懷無通無塞之見遇值其不塞卽吾身而見唐虞遇扼於不通守先王以待來者雖

執經守澹何嘗不尊焉在孔門不論如後世匡衡之詩
夏侯之書朱雲之易董子之春秋皆尊主庇民於今爲
烈夫非明經中之錚錚者歟而使其貶己以徇人曲學
以阿世以是而明經不尊經與有辱焉三榮古善地自
文翁化教之後人傑彬彬直冠西蜀其燦然蔚然著聲
前代者不暇屈指如國朝胡忠烈公身支宇宙質負綱
常卽出其門內之釵裙亦足愧朝中之簪紱芳名號耳
正氣撐天豈但借尊於六經經且待之而尊焉迄於今
佑啓三榮作率多士周楨商鼎代不乏人夫非公之以
經學開來也耶夫宇宙長昭明不闇習恃此六經之道

榮

縣志

卷三十四

藝文志

明文

二十二

在一人則耳目不得不聰明在天下則風俗不得不醇
厚古人號明經者淺用之則眇論可以解頤微辨可以
折角深用之則尙書測變故於陰暄春秋徵善敗於機
祥況乎大用之則煉石可以補天鼈足可以鎮地其無
偶之體無尙之功爲何如卽腹笥書篋者人猶得引爲
不善尊經者之戒而况借爲階榮席寵之地也榮人士
當經始之初味建閣之義會經以心卽心得經入而窮
其高明之體出而究其廣大之用則地脉興隆卽道脉
昌明之日也俾此閣之建下陋天祿石渠之制而直接
夫杏壇魯壁之傳則中丞開來之意直指造士之心其

兩無負乎而郡守有司均與有榮施矣是爲記 萬曆

三十四年秋八月

榮梨山靈應侯禱雨感應復祀碑

邑令

楊崇忠

榮縣古榮州也考之輿圖在宋爲紹熙郡以三榮稱榮梨山其一也離城八里許神囂岳立仙的皎臨唯山之巔有巨人跡眞贗莫辨山脊有池沆漭漠默弗涸山前有洞橫出豎入弗碍洞門有沒字碑五統志所謂龍戶乎韓退之云衙時龍戶集卽此謂矣榮苦旱然石擾洞輒雨宋人咸祀之歲久未舉余視榮初年狒猝大延伋如旦饑黎民糠粃窄痔乃錢鑄都無所施余怵憚而洞

榮

縣志

卷三十四

藝文志

明文

二十三

疑焉榮父老以前事告余余偕諸屬吏暨耆老人羣咸以禱請遠步倚倚墾塿徑微至則閒鞞鼓之剽棧叩之未幾雲霧吐合障蔽天日龍洞瀉深賁其隈天池洑流決其阿雲霞覆覆不絕如注余神其事感其德請之上臺歲祀咸如宋例房蒸淡羹俎列常豆故知非以香火徼福杯尊乞靈俾後之視榮民者咸知旱之禱惟神之祀惟雨勒諸片石以志不謬 崇禎七年十月

重修文廟記

戶部
主事

簡

勅 邑人

榮在昔爲青陽國南安郡唐爲大牢旭川和義郡宋爲榮州紹熙府王禹謂封域千里山川重阻原志謂地曠

人稀民良俗樸郡乘謂民勤稼穡士尙詩書張仲謂風
淳事簡可以道化號爲東州道院李敦謂五陵橫瓦延
袤三里題爲小錦城蓋吾榮背負五山周沿四水真有
得夫形勢之勝者至於興賢育才化民成俗則首崇學
校榮學唐武德元年建於桂林山宋乾德三年移近興
賢門紹熙十三年孟侯遷於蓮宇山開禧二年袁桂立
題名雁塔教授劉道成記略云榮雖藩邸重鎮學凡三
遷始得勝地國朝平定海宇偃武修文洪武六年始降
榮州儒學印時別駕馬公輔學正張朝祖仍創於桂林
山天順元年徐州學正邑人龔匯奏復今處舊志謂金

榮

縣志

卷三十四

藝文志

明文

二十四

是役也始事於甲戌年七月成功於乙亥年三月余快
覩此舉不敢以庸闇辭聊書巔末托之貞珉竝記其歲
月云 崇禎八年六月

國朝文

修復學宮記

劉世璋

邑舉人

明天順初孝廉龔文淵先生請移修學宮於蓮宇之麓
制崇四丈四尺木巨而工稱至

國朝康熙壬戌六月六日靡焉就圯蓋閱年已二百一十有
九矣而

先師遺像幸不毀於榱崩棟折間或亦在天之靈寔式憑之

榮縣志

卷三十四

藝文志

國朝文

二十五

歟今者復觀厥成制不逮古遠甚而成之之難則有楮
墨難罄者方經始也山無近伐之木郊無近貿之瓦鄉
先生已凋謝弟子員亦落落也計無所出呈請通詳及
奉批不過曰仰同紳衿設法修復而已嗚呼設法豈易
言哉璋爰集同志各出貲以爲倡更謀之荆邑侯劉尉
君倣守憲張公軼事製捐助一冊土請助於列上臺次
請助於隣郡邑由是西赴成嘉則程生調鼎劉生世珩
楊生于基南下永富則劉生世璣鳩匠入山則丁生文
永曹生郁率相踵事則程生慄宋生國瑞奉委督工則
義民何文選李國猷鄒懷榮劉文瑞趨事之大較如此

維時捐助勸修實荆侯倡之劉君繼之若陶若梓若攻石之用始具無何荆侯以解組去劉君以讀禮謝功幾中輟會高陽韓侯以候內補改授吾邑下車謁廟見厥功未集捐廉外復諭諸士酌可充學者如議而後得觀厥成璋三年來夙夜徬徨据拮萬狀恆惴惴焉有鮮終之慮茲荷列上臺并隣邦諸公暨吾邑賢侯賢尉良士庶不忍

先師之廟沒於蒿萊而共襄盛舉也因得與同事諸人藉手報竣或亦文淵先生所不及料乎謹勒石以告來者倘後之君子念今日成之之難不時省視嗣而葺之更起

榮縣志

卷三十四

藝文志

國朝文

二十六

兩廡以完體制是所幸甚 康熙二十三年歲次甲子冬至日立石

重修明倫堂記

邑令 王 澤

自古帝王之治天下也必以教化爲要而教化必以人倫爲先此庠序學校之設命名雖異皆所以明人倫也方今

聖天子牖民孔切特製

聖諭十六條首云敦孝弟以重人倫益以徵倫者乃人之所以爲人而不可一日不明者也然而明之需乎人猶需乎地故內而國學有彝倫堂外而各直省鄉學莫不有

明倫堂原令司教者坐此堂以明五倫俾人胥曉然於親義序信別之理由而行之毋背而馳之堂綦重矣哉予曩秉右芮鐸仰體

聖天子重倫至意日集士於堂宣講倫道用膺卓薦

銜試第一名令宰茲土壬午夏季抵邑越三日謁文廟見明倫堂蕩然無存止有故址在荒榛蔓草中詢之知明末兵燹後廢莫建嗚呼此教學之地也而令其久隳可乎既而披閱邑乘其前代科第人文不必論矣而忠臣孝子義夫節婦更不乏人猗歟休哉厥風良古而今何異也或得之傳聞或遇之牒訴竟有所爲大乖倫道而恬

榮縣志

卷三十四

藝文志

國朝文

二十七

不知非者噫以秉禮守義之邦一轉而爲傷風敗俗之行是果古今人不相及耶抑或此堂壞而人倫不明以至斯極也乃亟議所以修之而苦於工費維艱適有應入官之金予乃與諸生竊計曰建堂之基其在是乎用據士情兩詳臬憲劉公獲邀俯俞撥給修造有不足予捐以倡而僚友紳士以逮商民亦皆樂輸錙銖更得庠友劉其參宋聯芳等實心董事而予亦不時省試是以作者勤爲者疾創始於甲申九月告成於是年十一月雖較諸舊制尙缺儀門及東西兩齋而正堂聿新棟宇崔巍豈惟敷教有地卽過斯堂者想莫不顧名思義竦

然動敦倫之念行見風移俗易還醇樸而追先正予亦得藉是以報績於

盛朝矣豈不美哉工既竣例勒貞珉諸生屬予爲文予忝司牧有風教之責固難以不敏謝况劉臬憲重道作人之懷直與昌黎造潮文翁化蜀相髣髴其功又何可沒也予因卽其事而記之使後世登是堂咸知堂之所由建也旣落成予乃舉酒於堂上聚士民而告之曰文人學士平日誦詩讀書自當知綱常名教之樂而蚩蚩者氓亦必凜遵

聖訓父詔其子兄勉其弟思踐土食毛之德殫忠君報國之

榮縣志

卷三十四

藝文志

國朝文

二十八

忱講孝慈而言友恭型家室而重久要共相鼓舞率循於人倫之中而無干名犯義之戾則堂之建爲不虛矣是予所深望也夫 康熙四十四年乙酉孟夏月

重修學宮碑記

邑令

黃大本

嘉興人

榮學舊在縣治之東前明天順八年邑孝廉龔匯奏請改建蓮宇山之麓

國朝康熙二十一年六月圯邑孝廉劉世璋百端區畫越三年廟成今又七十餘年矣辛未夏余承乏榮篆文廟漸就傾頽於癸酉之二月鳩工庀材躬親相度計捐俸三百餘金七閱月而工竣頃者余閱龔孝廉請修學校疏

有異焉其疏曰師生欲爲而難能有司當爲而不顧嗚呼何立言之戇也夫身膺民社凡地方之利弊民生之休戚人才之隆替學校之盛衰有司分內事若於分內所當爲者而不顧則其日有孳孳而不敢告勞者皆其所不當爲而爲也龔孝廉殆有所激而云然歟余愧譴劣未能突過前人而分所當爲者不敢不勉力以爲之費不侵官役不擾民凡以盡吾分云耳落成紀其事并書龔孝廉語旣以自警亦欲藉以告來者 乾隆十有八年癸酉月

重修學宮碑記

李長笏富順人

榮縣志

卷三十四

藝文志

國朝文

二十九

國朝文治之隆遠邁前代方今

聖天子崇儒重道凡僻壤窮鄉隸版圖者無不崇祀先師修明庠序矧三榮爲蜀南巨邑官司之所振興士民之所矜式其不敢因陋就簡貽譏缺略也明矣粵稽聖廟之建明初在縣治東天順閒邑人龔匯奏請改建今地康熙壬戌翦焉覆蹶孝廉劉世璋集諸同志區畫百端始復舊制乾隆癸酉邑宰黃大本捐俸鳩工補殘缺理漫漶黜堊丹漆旣麗且崇戊子歲笏隨叔莖肄業書院肅瞻先師遺像見殿宇爽塏迴廊紆折泮林古柏連薨接棟每風晨月夕與金碧之色相輝映於山青水綠閒使

人肅然而生敬距今二十有三載矣重遊於茲望宮牆則柏栽千株鬱然深秀矣入戟門則華闕洞開玉題金鋪崢嶸延屬矣登廣庭則雕欒鏤椽連閣對橫雲氣圖而珍靈集矣陽臺陰基砥平森臨足習步頓以升降矣所謂清廟肅以微微彌萬祀而無衰者體制不尤崇閎歟已而紳耆等徵記於笏詢之則同年學博馮廷賡丁未秉鐸斯邑仰見棟宇微欹朱漆剝落蹶然謀所以新之於是商諸邑宰張兆星諏及紳士張應鵬黃元中等各歡欣踴躍共襄盛舉後邑宰馬履中龔巽繼之用觀厥成焉是役也經始於己酉夏五月告竣於辛亥秋七

榮

縣志

卷三十四

藝文志

國朝文

三十

月共糜金錢二千餘貫其間之不避寒暑不辭勞瘁者則耆民鄒正鵬及世璋之元孫純修經紀大綱厥功尤多而官文廣程九皋亦區畫不遺瑣屑三載以來時和年豐民氣安恬殆亦有默相者矣笏觀前代明聖當干戈甫定草萊初闢靡不右文勸學推崇師表以爲天下後世法又况躬際

隆平沐浴膏澤其竭誠敬而祀春秋者當更何如乎苟必俟邃宇隳頽始圖興復則力勞而費愈鉅今官司之倡率如彼士民之趨赴如此此可見人情樂善之心大抵同然而茂美易成之材必有與教化相深者抑聞己酉歲

廟貌方新是科蜚聲藻榜者三人嗚呼天人相感之理不其然歟笏故從紳民之請畢書巔末以告夫凡爲聖人之徒者 乾隆五十六年孟秋月

改葺文廟碑記

邑令 許源

蓮宇據榮五山中爲金水資生地而 文廟在焉自有明邑孝廉龔匯奏請改建以來當事者不時補葺制云備矣余壬戌下車敬謁之循殿而前爲戟門爲櫺星門又前爲泮池池外爲屏相去甚遠屏外爲聖門坊坊外凸出爲複牆綿延數十丈東西建禮門義路二門荆棘叢雜蔽錮不通且兩翼又爲民房所扼故於泮池內地

榮

縣志

卷三十四

藝文志

國朝文

三十一

另闢門出入余旣相其形勢之隔越前後廣狹之不均未嘗不歎其制雖備而未善也夫崇興學校有司所有事前人爲之未善而後人復因之曠職多矣善乎龔孝廉之言曰師生欲爲而難能有司當爲而不顧其言良不爲過耳余欲有以更之歲丙寅捐資爲倡邑人士爭來勸事計得金三千有奇恭繪聖像暨四配十哲諸像新大成殿戟門及櫺星門濬泮池移聖門坊於泮池旁建德配天地二坊購西偏李姓基址移禮門義路二門於聖門坊前左右障以雲龍石屏作宮牆勢隔越者聯屬之叢雜者剔除之廣狹不均者整齊之堂然皇然

如翼如跂於是百餘年未盡善之制一旦煥然改觀矣
是役也余敢自云盡職而亦竊有幸焉者三榮爲古名
郡碩儒英彥代有其人如宋之王氏父子昆季文章行
誼炳蔚一門前明以節義著者則有胡仲常侍郎簡季
麟太守諸人類皆循循名教敦崇聖學繼自今邑人士
入廟思敬礪廉隅修實行上追鄉先達之遺風毋斤斤
於涉獵科名以縈青紆紫爲榮幸也其庶不負斯役之
意也歟役竣因其餘資建試院董事貢生張廷桂邱思
詮生員龔廷肅彭一元吳兆元監生吳漢祺朱于瑄張
正瑗例得備書 嘉慶十三年二月

榮

縣志

卷三十四

藝文志

國朝文

三十二

改修文廟碑記

廖朝翼邑進士

邑城凡五山蓮宇介清富鳳鳴兩山間巒頭端秀背岡
面水誠冲和蘊藉神明之奧區也前明天順八年邑孝
廉龔文淵匯奏請改建學宮於山麓百餘年間邑中領
解者五六人捷兩榜者亦濟濟多士休哉誠一時之盛
哉我

國朝康熙二十一年六月忽圯時邑孝廉劉公世璋率眾營
繕三載而廟成又十餘載兩廡始備自時厥後邑侯黃
公大本龔公巽許公源先後培修蓋亦有以崇祀典而
肅觀瞻矣迄今道光十七年諸多損壞邑紳士勸捐爲

增新計而形家謂癸山丁向不如改作子午爲尤吉仰瞻

聖像亦若子午爲較正焉夫形家談數固吾儒所不深求然尊

聖像以辨方位則亦君子大居正理之可信者也遂於是年冬改建

崇聖祠櫺星門奎星閣越十九年接移

大成殿大成門東西兩廡漸及宮牆泮池甬道木石土工竝作金漆丹碧兼施至十二月而工竣共費五千餘金由是宮庭肅穆廊廡秩翼崇階峻陞既法度之謹嚴刻桷

榮縣志

卷三十四

藝文志

國朝文

三十三

丹楹復文章之炳煥宮牆數仞聚秀藏英泮水一池揚波耀日局勢則宏敞也體制則正大也堂哉皇哉氣象爲一新矣今而後遊

聖人之門者思

聖人之德體

聖人之教效

聖人之學將山水益爲發祥人文於焉日盛處爲醇儒出爲名宦豈特科甲蟬聯已哉 道光二十年二月

培修明倫堂記

教諭

劉德煜

南充人

事有相連而及相因而舉者理勢之當然亦人心所共

快如榮邑培修

聖廟及於學署是已方余承乏於斯也明倫堂規模宏大而瓦桷損壞臥碑模糊東西齋復有岌岌欲傾狀喟然曰明倫堂爲學校重地臥碑

功令所關東西齋亦肄業所任其頽廢不振可乎召齋長謀之乃知前任李太西先生已有此議以讀禮去不果蓋培修

聖廟餘貲可集此事旣卜之吉若瓦若木若石以次庀材於明倫堂之壞者易之闕者補之壯其觀也於臥碑刮磨之新鐫之使諸生易讀也周圍牆覆以瓦堊以灰欲其堅而久也且於堂後改創大厦司鐸者幸得所寢處也然於東西齋及大門甬道猶未及舉余乃捐俸爲之不足繼以勸募而事乃集是役也始於道光十九年至今年五月次第落成非得

聖廟餘貲不至此非紳士踴躍好義亦不至此相連而及相因而舉倘所謂理勢之當然人心之共快者非耶然猶有望於諸生者敦實行崇正學經明行修有體有用於以仰副我

朝作育人材之至意豈不懿哉是爲序 道光二十年六月

建鳳鳴書院記

建昌 觀察 徐大枚

余承乏建南監司歲癸酉蜀闈余爲內監試榮令黃名
大本奉檄爲同考官大主考侍講圖公幹布副主考吏
部員外郎馮公成修於衡文堂恭誦

諭旨飭各府州縣興舉義學余卽以義學之興廢詢之諸同
考官黃子以其縣創建鳳鳴書院應并述其紳士捐金
買田以供齋廚纖悉畢備余竊慨夫州縣之任甚重地
方興舉惟賢有司是賴今幸值右文

盛世百里之寄遴選科目以讀書種子之蘊蓄出而爲經濟
之才愛民必兼愛士善養尤貴善教黃子是舉洵足鼓
吹休明無媿乎父母斯民者也時兩主考亦雅爲推許

榮縣志

卷三十四

藝文志

國朝文

三十五

黃子請記於予因爲之紀其巔末 乾隆十有八年癸
酉九月

鳳鳴書院重增膏火碑記

邑令龔巽

有地有資有師有友有程有考而後可以言業是故事
農者必於田事工者必於肆事賈者必於市遷其地弗
能爲良也凡藝皆然學爲甚榮之鳳鳴書院舊爲公署
自己丑年李公鏞始改建爲士子肄業所後黃公大本
張公成器張公兆星任內各有增益然總其成數不過
八十餘金不足供束脩膏火費執經者亦寥寥無幾是
僅有其地而資之不繼以致師友程考之法咸略焉庚

戌秋余莅止後偶一過從慨嘆者久之飭吏檢舊籍稽其田舍之息較民業僅獲十之五六爰命老成民鄒正鵬劉純修協以書役痛爲釐剔又修葺書院及縣署前東西官地民租新置房若干間增爲院費加以士民程九皋等樂輸每歲新舊所入計得數百金夫移風易俗肇端士習黨庠術序古之教也勸學興賢汲引後進父師事也興利而舉廢典守者專責也嘉陵山川盤鬱素稱人文淵藪治官更建藩宋代衣冠文物炳炳烺烺於山有六鰲五保龍標虎榜之奇於水有蒼葉白楊桂村梅香之秀故漢晉以還費氏之門第王氏之家學延之

榮

縣志

卷三十四

藝文志

國朝文

三十六

之才識子昭之忠貞史不絕書逮我

本朝右文崇德前輝後映如玉受琢如金在鎔又百五十年承乏斯邑者自宜網羅俊乂牖啓來茲仰副

聖天子作人雅化又况利不外求功非旁借以屢年膏腴美產飽吏民之谿壑者一旦還之朝廷爲一邑人文之實用揆之始事諸君子當有同心也繼自今教育善其師督責備其官觀摩樂其羣衣食贍其費勞在一日澤及百年使異日蠶叢之產得與鄒魯宿儒齊驅竝駕風塵吏與有榮施矣於是商立良法杜絕流弊縷析條分勒諸碑石 乾隆五十八年仲秋月

桂林書院碑記

邑令 宮鑑桂 海陵

桂林書院以其地名之也予初興義學買得城內桂林山房屋田土修成書院喜其地名有合於文學之事因卽以桂林爲名榮邑既有鳳鳴書院又何用桂林爲者讀書者眾一書院固難盡收且彼專爲成人造就之所而此則雖小子亦可來學蓋經館之屬義學之類書院之副也山不甚高而地勢崇隆書院建其麓自門而入以漸而升屋雖不多而內外講堂兩廊學舍寬廠宏大足爲數十人肄業之區且其地處幽靜無輿馬之喧無囂塵之擾雖曰城市無異山林誠讀書之善地也予嘗

榮

縣志

卷三十四

藝文志

國朝文

三十七

登其堂而望之田廬繡錯烟樹蒼茫城以內天慶鳳鳴諸山連綿疊起城以外東有龍頭西有鳳棲峰巒環抱競秀爭奇予固不知其風水何如而景象萬千豁人心目多士於誦讀之餘徘徊瞻眺其會心不遠者吾知其於聖道且將有悟焉矣豈惟文思漸進而已哉斯院剏建於甲戌夏五月鳩工庀材董事者不負委任迨予北上歸則規模已具乃爲籌其經費延師訓課考取生童酌予膏火竝給獎賞上科卽中式生員吳容後日之人才蔚起尙可量哉今春乃復補修而予又因公交卸差旋始能卒事乃併泐諸石焉 嘉慶二十二年

新建考棚碑記

許源

人生未歷之境處之安與不安者恆不一而足苟無所感觸於當前要未能一一曲籌之而先事經營也余束髮應童子試邑故爲楚南巨區諸營建較他邑特備彙試處制雖減於學政試院而宏敞有過之無不及也應試者約二三千數魚魚雅雅羣然無燥溼之虞余亦濫竽其閒覺處之寬適如窗下以爲彙試處固盡如是也稍長舉於鄉率恣遊於燕趙秦豫閒則已有不盡如是者歲乙卯捧檄來川歷代庖漢州仁壽三臺內江等邑偶值科歲試或扃之於官衙或集之於蕭寺類皆露處

榮

縣志

卷三十四

藝文志

國朝文

三十八

其中炎蒸風雨各聽其時之適值而已憶曩日所謂寬適如窗下而身受之者斯境胡可一朝居心怵怵焉而未能卽有以處之也壬戌授茲邑試士則於城北萬壽寺其露處與向之代庖諸邑等心益怵怵焉雖未能卽有以處之而不得不急謀有以處之也會補修文廟及文昌宮工竣計存餘資若干因仰聖人之餘資以爲覆庇聖人之徒之用俾士子身處之而欣然盡一日長焉是則余試士來區區之心也夫棚在文昌宮側左右各九間官廳三間龍門坊一座坐號一千二百有奇董事例書名者貢生張廷桂邱思詮生員龔廷肅彭一元

吳兆元監生吳漢祺朱于瑄張正瑗也 嘉慶十三年八月

修演武廳記

許源

國家以文武取士其進身之階則自縣始顧人才之甄拔與夫士氣之振興尤不能不重資乎其地焉余蒞榮初試士於邑之萬壽寺編竹爲棚上雨旁風諸童苦之丁卯秋爲創建考棚於文昌宮側而演武之地未遑兼營也考棚工竣會武生賴儀賓等以邑民劉姓侵佔校場事上傳質不誣勘令退復如初卽於其中構演武廳一座豎照壁修馬道南至柳溝橋北至迎恩門東至劉姓地界以石西至河沿河一帶坍塌處作石堤高一丈長四十餘丈以固之其規模壯闊殆與考棚爭勝矣自是校閱騎射諸生追逐往來莫不呈能獻技以殫厥長焉夫

國家重文事兼資武備騶虞貍首休哉

盛世之風也諸生勉乎哉地靈人傑之言將於是乎在董事張廷桂邱思詮龔廷肅彭一元吳兆元朱于瑄張正瑗吳漢祺竝書於後 嘉慶十三年十月

補修先農壇記

許源

王文長云食爲民天農爲政本苟無農何有食苟無食

榮

縣志

卷三十四

藝文志

國朝文

三十九

何有民是以粒我蒸民神之德克配彼天焉余守榮奉彝章修祀事詣壇壇荒落弗稱仰視廟壁破階頽而兩旁敗屋俱不堪爲托足地嗚呼此神受饗所也而顧令若是其若報本何爲命督修各祠宇首人鼎新之壇遵會典遺制廟三楹中藏神主左右爲旁屋覆以瓦砌以磚塗澤以粉週繚以牆前豎以照壁稍稱余報本意落成後余爲記勒石 嘉慶十四年二月

建離明宮碑記

許源

余於嘉慶壬戌歲承乏茲邑下車伊始虔謁咸秩諸神獨火神無專祠附於武廟之東北隅幽闇特甚殊不足

榮

縣志

卷三十四

藝文志

國朝文

四十

明祀事而仰神庥惟神功昭調劑象協文明而鬱攸思防回祿之禱與元冥竝著不應褻視若此心恆惴惴焉而未得所以妥之也舊俗署中敢用燈油有官價名色較民價稍減邑之業油榨者積有公項千餘金每年收息以供斯役盈絀之費余以闔署日用所需裁汰陋規悉準市價而何可獨以此擾吾民也用是商之紳耆行戶爲罷官油之役以存項買城南地一區建正殿五楹翼以抱廳殿中祀火神像西祀川主東祀張葛二僊油行素所崇奉者也兩廂建樓房二殿前修樂樓一廟外環繚以牆計年餘而竣事甄埴木工若干費其有不足

則士民樂助以成之一時廟貌維新正祀無缺董其事者如張耀明孟美成盧子旺顧星景徐錦富等咸始終厥事朝夕不聞告勞余既欣神之得所安而竝喜邑士民之能襄是舉也爰識其端末如此 嘉慶十二年十一月

重修白雀寺記

邑合陞永寧府知府 藺松

城南里許羅漢洞唐宋迄今綿亙數百年不可謂非西天邃跡也舊李唐有白雀寺右附嘯臺大佛及崖穴阿羅諸像其勝跨連岡澗漱咽煙嵐爲山靈徵神構高人游覽於斯賦也銘也誠有如繪圖莫罄焉者甲申兵火

榮縣志 卷三十四 藝文志 國朝文 四十一

頻仍昔之所稱白雀寺轉盼焦土成堆荒榛雜立從前大眾比邱亦似孤雲野鶴杳不知持瓶鉢於何往矣我大清底定歷戍戔遠僧性空始止之芟除藤蔓結豎數椽僅於洞中與二三殘佛表裏護持未幾而又有僧傳明者憇焉彼此互攄苦衷毅然以興起爲任無如遷播餘生饘粥多不自贍卽有好善樂施亦付空譚罔濟耳余自康熙六年歲丁未蒞榮偶一登臨仰睇溼紅飛翠彩鳳碧雞信夫天然之巧不能以人力奪也嘯臺大佛崖穴阿羅雖敝不成新而砆然布列既有僧贍此寧非眞爲幻住乎第荆茅粗翦偉構猶虛因而勉捐薄俸就洞

建蓋重簷高卑廣狹略開供養之基木石灰釘不墮經
營之力敢云鹿苑再興猥令鷲峰半峙嗣此隨喜見聞
俱得自在禮拜讚嘆獲所皈依山雨欲來足蔽朽枯竹
檻秋風吹動弗苦飄蕩蓬簷尙有增修未盡補葺不工
自視余力余才何敢獨專其美斯又望於後之君子從
而潤飾之爲山門作廣大觀證上乘果已爾始於己酉
告成於庚戌是爲記

觀音閣募引

邑令 黃大本

榮邑南郊擦耳崖舊刻觀音大士像有亭以蔽風雨肅
觀瞻滄桑變易坡坎僅存佛法一切皆空原不藉像教

榮

縣志

卷三十四

藝文志

國朝文

四二

輝煌生歡喜相亦不因雨淋日炙生煩惱心清淨寂滅
普度眾生眾生能作如是觀何處非觀音現身設法之
所復何有於寸椽尺木曉曉焉向六塵不斷中乞人施
捨耶今有愿民程子俊等以福田利益爲心欲興舉崖
前大士亭宇地僻而勢險溪流漲溢肇建石堤崖勢巍
然棟宇高聳其費苦於不貲必得眾擎之力乃易舉本
縣膺茲民社之責豈敢云百廢具興但願吾民革薄從
忠體佞佛之心識尊君親上之義內則孝養父母父母
卽觀音也外而睦婣任卹講讓型仁到處皆觀音現身
設法也從此慈航法雨普度一切眾生凡吾子民盡作

佛門善男信女非風移俗易之明效大驗也哉用稍捐廉俸爲之倡始竝載筆而爲之弁其首

重建飛仙橋記

黃大本

榮治負山三面臨水水東西流合於城之南各有橋甚鉅歲甲戌六月水驟發橋皆圯鳩工估計費不貲榮又窘頗不忍勞吾民黃上舍國樑邑人也來謁言奉其大母命願以城東飛仙橋爲己任余以其幼孤年又少未之許上舍曰是橋也生之祖創之父修之兩代於茲矣直吾家事耳余閱飛仙橋舊碑誠然竊嘆其家世高誼許之役始於是年十月訖十二月而橋成長十二尋有

榮

縣志

卷三十四

藝文志

國朝文

四十三

奇廣闊如舊製工二百有奇費一百二十金有奇皆上舍一人力也余嘉上舍承先志爲不可及勒諸石以爲榮縉紳之克世其家者勸 乾隆十有九年十二月

重建迎恩橋碑記

邑令

張兆星

婁縣人

邑治西距城數武舊有橋曰迎恩自省會而下輿馬擔負咸取塗焉蓋要津也乃一葺於前令徐明府再葺於前令黃明府而邑中好義者復嘗斂金以繕之皆不久而坍塌

今上四十有九年余奉檄來守茲土將興廢舉墜首議建此橋嘗試臨其上而諦觀焉見其形如半規制雖闊而弗

良也乃告邑人曰爾知斯橋之所以數圯者乎是其身弗密而齒弗疏也身弗密故水之來也洄而剽齒弗疏故湍之激也怒而張無惑乎不能久也其必改爲之乃更授以程式規者使平闊者使約宜密密宜疏疏擇老成有幹局者數輩董其事於是權財召匠揆日授工經始於是年十月戊午越明年三月己卯落成爲洞者高九尺五寸縱一百三十五尺橫九尺計工七千有奇費凡八百餘金是役也凡官斯土者各捐俸有差而邑人復樂輸助其執役董事人等勞勩有日悉令書於左以示勸云 乾隆五十年三月

榮

縣志

卷三十四

藝文志

國朝文

四十四

新修來安東匯兩寨碑記

龔 巽

榮城濱兩河河夾於山南二峯突烟霄而上曰屏風曰白塔羅漢洞距郭半里許峻嶒峭拔四圍石壁立可通步武者僅十之一二上約容十餘萬人蓋最峻而偏也歲在丙辰達州叛賊徐添德王三槐等勾結兩楚陝豫盜跳梁四出流竄焚掠五年於茲屢奉大憲檄村各設團團各立寨無事則出安耕鑿有事則入謀保拒一方有警諸路響應彷彿古人寓兵於農守望相助之遺制柰地判險夷人殊愚智其緒未竟庚申三月賊夜由定遠偷渡潼河擾我鹽亭遂寧安岳樂至諸邑附近民人

蕩析離居童稚輜重委棄不顧者絡繹於道我榮邑相去數百里世家巨族亦間有不走邑中而徙他郡者詢諸父老僉云城雖新葺孤立無援終恐難恃余典守斯土蒿目不忍視又弗能禁也戚戚於心不遑假寐者數日趙奢傳曰先據北山上者勝後至者敗兩峯者榮之北山也爰偕僚友紳耆解事龔庭肅張廷桂等登其巔俯仰四望蟻垤岡陵彈丸城郭自官舍民廩倉廩囹圄街衢巷陌田畝林墓以及爨烟之疎密地勢之凹凸婦子之作息鷄犬之鳴吠如視磨上蟻掌中螺莫或遁隱使爲賊據利害相去不可以道里計用是陟降荒度壁

榮

縣志

卷三十四

藝文志

國朝文

四五

斷者續以雉岡連者鑿爲池又喜石質堅細不煩攻錯他山可以代井渫之需可以限戎馬之足可以爲老稚婦女資財牛馬畜牧之場更於最高處建亭遠望設有不虞入而拒守炮礮遠攻矛矢近衛鼎足之勢旣成犄角之形斯固與城中珠聯璧合呼吸相通不啻手足之捍腹心頭目也賊卽深入殆烏投羅中魚遊釜底何所逃命繼自今我民其亦可心安疑釋不賦行野矣又况獻俘執馘而後四方寧謐於此望災祥占雲物察禾黍之豐儉考民力之勤怠又司牧者之責也余今歸矣後來者倘於春秋佳日借爲湯沐邑一觴一詠盤辟於兩

峯之間都人士女追隨其後提壺挈榼歌詠太平是今日與吾民同其憂者異日又得與吾民同其樂雖遠隔數千里外東望雲山爲余浮一大白不亦快哉 嘉慶五年夏五月

重建此君軒記

許源

一日不可無試問主人安在此中何所有惟餘明月長來浣薇賡魯直之詩曳屣溯元公之蹟摹舊題於古碣鴻印雖存仰芳躅於高人鳳鳴已杳荒苔滿徑瓦片飄零斜照半牆篁陰消瘦每關心而問訊益覽古以低徊余也家本瀟湘才慚丁卯一行作吏未能栽潘縣之花

榮

縣志

卷三十四

藝文志

國朝文

四十六

三弄臨風敢謂識柯亭之竹惟是琅琅漱玉竊比虛心轟轟干霄堪師直節况乃名賢寄跡勝境堪追豈可令烟草荒涼風泉淒冷竄黽而長嘯祕鸞鳳以無聲也乎爰集同人共襄斯舉軒成十笏預排玉筍之班門對千竿恍入篔簹之谷爲此君重開生面平安之信依然向古人頻藝心香風雅之林斯在 嘉慶十三年四月

修舞龍寺記

許源

祀典曰山川邱陵能出雲爲雨有功及物曰神諸侯在其地則祭之邑東榮黎山舞龍寺宋故封靈應侯廟也寺左右有池爲龍池右池下有洞教諭楊仲醇題曰噓

陰太守皇甫公於洞門建以亭亭畔有進士魯清碑記
既而亭圯碑亦廢邑令黃大本復爲建亭重刊魯清文
立石閒嘗考其碑記知神之靈應歷不爽云嘉慶壬戌
余宰斯土乙丑奉檄北行比歸邑大旱禱於神旋得雨
戊辰旱愈甚因思前之肸鬻如答復往禱焉而又恐其
或應或不應也用是齋心滌慮默祝加虔并倣董仲舒
推陰陽啓閉之法命工掘洞口淤塞以通山澤之氣不
崇朝大雨如注禾稼盡起其能出雲降雨之功爲何如
乎夫神之顯應若此不爲之新祠宇崇廟貌何以仰答
神庥爰商之邑人士張廷桂等醵金襄事正殿後殿加

榮

縣志

卷三十四

藝文志

國朝文

四七

以補葺修拜庭一抱廳二池與洞皆環以石欄山門圍
牆增高擴大悉倍諸前嗚呼庶幾可報神功矣雖然惟
神聰明正直福佑生民豈在區區黝堊丹漆爲哉第余
膺民牧不能感召甘和霖雨蒼生徒數數請命於神實
滋慝矣是役也旣以藉答神功而又誌余自責之意云
爾 嘉慶十三年十月

重修古鎮南塔記

許源

攷繙譯名義集塔西國浮圖也梵音窣堵坡似與儒家
無涉然多假以培文風於義何取蓋自唐韋肇及第偶
題名慈恩雁塔凡進士登第者遂爲故事後人習俗相

沿更有文筆峰之目亦往往輒應榮邑鎮南塔建自明時據城南龍頭山之巔濱河其左爲千佛鳳棲右爲眞如大佛諸山山皆蜿蜒起伏獨茲山平曠夷衍其氣散而弗凝是在有以鎮之斯塔之所由始也歲久就頽邑人士謂余曰前明建塔以來邑科名無少替今忽中落其塔弗殖故乎侯盍新之爲我邑人文光余固不惑於形家言然不忍古跡之就湮也爰鳩工補葺頓還舊觀高十丈有奇級凡十三嶙峋天半出没雲烟每當簷鐸齊鳴風輪四轉轟轟然發凌空駕遠之想他日都人士拔地干霄雲蒸霞蔚如韋肇題名故事蟬聯不絕書則雖狃於習俗之說謂斯塔爲文筆之一助是亦余之所厚望也夫 嘉慶十四年八月

重建望景樓記

許源

鳳棲山距城西里許萃嶽奇孤秀特出爲附郭諸山之冠絕頂處舊有危樓登之一邑之景萃焉前人顏曰望景創始年久無可考矣余蒞任後披志乘而識其名詢之則廢址僅存片瓦尺椽無有也爲心焉慨之歲戊辰民和年豐邑中廢墜者咸以次舉因重建斯樓凡三層層各二丈許廣闊倍之公餘之暇偕邑人士登而望焉俯視城郭如畫堞雉隨岡巒爲起伏五山峙其中雙

溪環其外蠶市桑田縱橫繡錯東對嘯臺大佛又東爲
榮黎髣髴有神龍氣其西則榮隱怪石方聳若印然南
接龍頭鎮南古塔在焉北睇金城天外三峰壁立東北
極榮德石室洞開與榮黎相激射烟雲縹緲竹樹玲瓏
瞬息幻千萬狀信乎登覽絕勝而望景之名不虛也夫
榮古夜郎地遷客騷人往來不一而足余之登斯樓也
一時之景如此四時之景可知後之過而登登而望者
覽物之情悲喜各異余豈獨異夫人情若夫不爲物喜
不以己悲如古人之先憂後樂是又余之所重望於人
而不敢自許者也是役始於戊辰孟冬月成於己巳仲

榮

縣志

卷三十四

藝文志

國朝文

四九

冬月適呂仙奉

詔列入祀典而邑舊無祠余以呂仙雲遊天下三島十洲靡
所不至其或覽斯山之勝而凌虛嘯傲也亦宜因奉其
像於樓之首層顏山門曰純陽閣而樓名仍其舊計費
金千七百有奇董事則張廷桂王鳳鳴郝干城唐紹榮
曹舜濬黃玉燭也 嘉慶十四年十一月

重修藏經閣序

邑令

龔 巽

佛書果可治世乎儒者不必讀果不可治世乎賢者未
盡闢余嘗取而觀之矣其言雖佶屈而大旨期於懲忿
窒慾其書雖浩繁而大要歸於利物濟人嗚乎使人人

盡懷利濟之心而世已大治使人人盡修懲窒之學而世亦不必更治矣城西

萬壽寺爲守土者朝拜之所殿後藏經閣創於

國初年久就圯余視之缺如命董事鄒正鵬劉純修等倡募修補陷者培傾者豎剝落者丹漆以甲寅年七月初六庀材閱乙卯年三月葺事夫余讀儒者書也治榮以來遇士子講德行論文藝於書院買置鋪田贍其修脯增修舍宇時其安居余職也藏經余職乎雖然民之愚者不懼桁楊而懼冥罰爲民牧者間嘗以神道設教亦可彌縫王法所不及是知佛不必滅卽藏經閣亦不可

榮

縣志

卷三十四

藝文志

國朝文

五十

聽其朽也或曰是寺經凡若干卷必閣始可藏乎余曰經何拘閣藏也閣亦何拘有經也但使民之望閣者皆肅然起敬畏檢束身心是亦儒家所不廢者若佛書教人於無文字處領其旨要必欲向有字句處分別佛語菩薩語亦大非圓通者矣旣語或人言仍書以貽首事使刻石記歲月云

鏡香亭扁額後跋

嘉定知府

宋鳴琦

聞榮署西偏有池廣可數畝盈池皆種荷紅白錯出夏時花頗爛漫臨池有小嶼竹樹叢雜極饒葱蒨之致上有亭傾圯久矣匯泉明府葺而新之并旁屋小橋皆就

理焉郵屬題額因拈太白荷花鏡裏香句意以顏之匯
泉吏中之君子也公餘坐嘯其樂有加他日使余因暇
過榮梨得一徜徉其間花在鏡中身居香國當亦太乙
仙人別開一妙蓮世界也

重建湖廣館記

許源

余楚人也官於蜀三湘七澤之間夢寐依之粉雲梓雨
蓋無一日去諸懷也榮介敘嘉之交我楚之賢遷往來
者較眾舊有會館一區在城東南隅創自雍正間前尹
江夏劉公宗賢乾隆中武陵曾公承謨來宰是邑遷今
地工未竣也余於嘉慶七年承乏茲土公餘率鄉人往

榮

縣志

卷三十四

藝文志

國朝文

五一

謁之則空殿數楹香烟冷落堦前荆蔓叢生其不至爲
烏鼠之窟也幾希矣八年春謀有以修之爰捐俸爲倡
鄉人各欣然不移時得數千金乃遴鄉之老成者董其
事經營規畫歷數寒暑而館成中爲殿前爲抱廳廓如
也左右爲屋爲廊爲鐘鼓樓又前爲樂樓爲門爲坊鱗
如也中祀禹王暨關聖鎮江王森如也殿後置空基畱
爲花圃地雖添設有待而全館規模具矣是役也計費
金六千有奇落成日進鄉之父老子弟而告之曰維桑
與梓必恭敬止余來蜀有日矣迴憶瀟湘雲夢閒歲時
伏臘未嘗不感慨係之今日者得與諸父老聯鄉誼話

鄉情雖非吾楚土乎曷不可作吾楚觀也余也宦轍靡常安能長居於此他日諸父老率其子弟敦孝友力農桑暇則聚首一堂雍雍然聯故舊之歡曰斯館也是某某之所成以聚吾鄉人者豈非余之厚幸哉 嘉慶十

五年八月

陳公生祠記

張容邑舉人

昔召公布政憇息甘棠後人思其德並其樹而愛之澤何深也他如狄梁公前後爲寧魏二州刺史民愛仰之咸立生祠以祀賈敦頤兄弟相繼守洛州百姓勒棠棣碑誌慕可知至德感人衆心仰戴千載而下俱有同心

榮

縣志

卷三十四

藝文志

國朝文

五十二

吾邑侯陳公甲戌牧榮甫下車見荒殘山邑實心經理不數月而規模宏遠預知其德施我榮者必周以至繼跡其宣條約勸農桑立義學課士藝不憚勞也捐建泮宮修理廟宇橋路不吝橐也柔商賈嚴賊盜恤運夫至廉且能也禁私派緩催科核減竈稅請蠲鹽引以及步禱甘霖矜慎聽訟諭民報懇至公而至仁也恩施八載浹洽人心所謂民之父母士之師公其兼之矣今征軍將就人咸感德懷恩情不自禁始謀借寇知其不可驟得轉擬攀轅恐未必我留纏綿篤摯之思羣焉戚而不忍舍爰建生祠敬祀長生祿位俾垂久遠得常就瞻仰

而奉祀之筮吉於冬月二十九日肇工維時邑民懽然鼓舞不啻子來趨事未閱月而功告成於以見榮人德公之深戴公之至藉祠以示不忘亦與召公甘棠梁公賈公祠祀碑銘共傳不朽也云爾公名士獻號梅亭廣東潮州揭陽人戊午科舉人任榮縣知縣

改建奎閣記

湖北知縣 鄧錫綸 邑舉人

吾等戊戌歲改建文昌宮於鳳鳴山時同事諸人士共議以工竣次當改建奎星閣無何經營兩載拮据百端僅成一殿而於前廳後寢之應修完者仍自缺如當時同人中共稱改建奎星閣者至是未有談及矣庚子春榮縣志

卷三十四

藝文志

國朝文

五十三

任貢井王公攝榮篆公江左桐城人深通地理甫下車

周覽五山形勝謂

聖廟極爲得所而奎星閣迫塞於櫺星門之東角甚非善地卽進吾等諭以改建之意於時適值

覃恩免徵川省條糧火耗顧已先徵銀三百一十二兩三錢五分公卽出此項商諸三榮紳士耆老衆皆允諾因命綸與朱璽鄒正鵬董其事其時綸方課徒鳳鳴書院僅得於館課之暇時一往視璽與正鵬終日督率一切工傭匠作木石礮瓦丹漆值盛暑雖炙背黃馘汗出浹土不以爲勞鄒子雅善營度凡其體裁樣式皆其所口講

指畫自四月迄七月而工竣閣高四丈有奇周遭六丈六尺八寸一時稱實枚焉論者謂奎主文昌故五星珠聯挺生賢哲魁次斗首四星故巍科高第於斯默應執是說也凡以爲科名設也是不謂不然抑亦有進於此者聖人之所以教人者不外修德行道

帝君之所以教人者曰孝曰友有爲教之者必有爲綜核而檢點之者大概奎星之神卽以此綜核檢點於其能修德行道不愧孝友者註之桂籍故俗傳登科擢第必待奎神點首此言誠是特未進探其本也然則吾等之所以建閣也不當盡以風水論也母亦惟是講求於聖人與

榮縣志

卷三十四

藝文志

國朝文

五十四

帝君之所以教奎星之所以註筆者以期於不謬焉爰奉以爲明質尊以爲嚴師而思有以憑依其神而妥佑其靈斯於功之已成者不時保護之培植之於文昌宮之未完者更踴躍繕完之則服其教必有以昭其祀而崇其宇理固然也非好事也因援筆誌之以爲後之君子勸

修城記

王培荀

山東人

道光辛丑冬余承乏來榮到任之始周視城垣規模宏闊惟北門頽敝問故云前任馬公修補時方向不宜因循未整西門較完亦有損壞不修將與北門等退而考

諸邑乘雖屢有修葺而從未有記夫平時若不急之務而因仍不舉後日必有爲之悔者况城爲倉庫監獄所托數萬生靈所係此綢繆未雨所迫不遑待也往者逆匪之變所至蹂躪

廟堂爲之旰食閭里紛然惟高城深池得以保聚無恐榮之所以無患未必非前任諸公修葺之力有以折其萌也幸而

皇威耆定父老享太平之日久矣河堤千里蟻穴必防太行萬仞跛羊可登古人慎其微亦懼其漸余欲終馬公前功非徒爲觀美之具也壬寅延紳耆聚謀僉謂俟秋後

榮縣志

卷三十四

藝文志

國朝文

五五

募金錢所費尙不甚奢適海疆有事勸諭捐輸幾及萬金勢不可重煩吾民決意捐廉自修請于

上憲允如所議及時修補未幾霖雨連綿桂林山畔崩塌二十四丈八尺又崩塌十丈九尺功未及舉膨裂者更十丈餘矣計費視前更鉅值秋闈調簾暫輟其役旋任後勉力從事念城之壞由堤不固乃修東門外護城堤五十四丈西門外護城石坎丈餘撤北門樓新之西門亦加補葺以次而垣墉屹屹矣考前任馬募紳士農商銀幾五千兩自二月至六月而功竣財饒事易集也余茲捐修爲功少而歷時久殊愧才短惟思各

上憲念切民依恆以城之完固與否殷殷是圖自慚無以報稱旣得葺事如完夙負與吾民永享無事之福沐皇仁於無已豈不休哉

凝翠樓記

城中少山山上祠宇參差竹樹茂密緯以平疇綠野此境爲難署中少園園中多水多竹多亭館花木此境爲難兩境兼之又難而吾以一樓專之榮署西偏地勢四下爲園三四畝自聽雨樓之南石磴逶迤紅欄曲折過停雲館下至會心不遠齋由齋過石橋而北爲鏡香亭四面皆水夏日荷花大放銷暑最宜園以竹爲藩籬雜

榮

縣志

卷三十四

藝文志

國朝文

五六

植芙蓉紫薇木瓜絳桃掩映亭畔以時代謝而芭蕉楊柳皂莢垂青擁綠以補其缺此前人培植之力而予坐享其逸也第一園之景一目可了北有知稼亭地基頗高可望園外而亭小地僻不耐久坐亦一憾也今秋內宅西偏一室忽圯乃就懸崖爲樓廠其前後與知稼亭相對小橋聯之而圍以牆公餘靜坐樓中俯視園內池光如鏡花木蔚如外見平野曠杳城內外山聳峙蜿蜒翠撲几席遂名之曰凝翠夫好遊覽而登陟爲勞愛池亭而修築非易茲丈餘斗室極曠如奧如之勝是前人所未及而予之所獨得也乃作記刻石 道光乙巳季

秋時般陽王培荀記

重修福星橋記

廖朝翼邑進士

世之富者往往修建寺觀揆其意特媚神以邀福非盡出于好義也夫利莫大于濟人善莫樂于忘己威邑顏厚菴家素饒在本邑義舉甚夥而尤切于濟人在富順鹽廠拯困扶危一係桑梓一係經商之地猶屬人情所難已榮邑汪家灘非其足跡所經聞人言往來者多病涉輒於上游建福星橋又於馬河橋設義渡近榮城望塔巖又建二美橋由望塔巖分東南修石路數十里蕩蕩平平行旅稱便自庚子暨乙巳福星橋修葺凡三次費在萬金以上毫無畛域之見非樂善不倦者能如是乎余向在京師見有蔡姓矜孤恤寡養老憐貧及義學等事措置極有條理竊以爲斯人不可多得今厚菴所爲豈出其下耶第彼事已上達

天聽而厚菴則不欲藉此以邀名榮之人終不欲沒其善謀壽之貞珉余故樂爲之記厚菴名昌英衛守備銜 道光二十五年

修雨棚記

彭鳴盛邑貢歲

且事有緩則置之急則需之需之至急而不得未嘗不嘆先事綢繆之爲功甚鉅好行其德之難其人也吾榮

榮

縣志

卷三十四

藝文志

國朝文

五十七

自 匯泉許侯修建考棚應童子試者已得坐次之安
泊 雪嶠王公蒞任嘉惠士林益宏教澤當縣試時振
衣升岡者莫不躍躍欲試顧雨雪無常多土方將魚貫
入而鵠立庭下者或不免濡首沾衣之慮此亦賢有司
所太息而無可如何者也邑紳歧山劉君名廷選惻然
動念自捐錢四百餘緡於龍門外甃甑石飭膠油鳩工
庀財建立雨棚八楹楹各深二丈八尺廣各丈三尺按
牌序立可容千餘人縱值雪嚴雨甚皆可恃而無恐咫
尺龍門從容徐入意氣既舒藻思自暢則劉君併幪多
士之惠不與邑侯作人之澤陰爲贊助歟工既成劉君
抑然自下不欲紀其事與名同人以爲不施不伐誠劉
君盛德也而吾人樂善之心遂聽其湮沒不彰乎爰刊
諸石以誌不朽云 道光二十四年秋七月上浣立

重修講教洞記

進士 曾省三

榮邑北關外二里許雙溪夾流上有石閣卽講教洞爲
宋王庠王序讀書處石壁殘碑半段筆意類坡公乾隆
中葉鄉人塑川主牛王大神像雜其中歲時祭賽寢不
知所以講教名洞之義而文人墨客亦罕有過而憑弔
焉者徒使名賢古蹟蕪沒於荒煙蔓草去馬來牛中甚
可嘆也歲丙寅京江國子達邑侯適宰是邦百廢具舉

榮

縣志

卷三十四

藝文志

國朝文

五十八

暇日偕司鐸魯卿蘇君徘徊斯洞惻然久之邑紳詹君
長坡謂宜遷各像別所補蒔竹樹以成雅觀吾師東崖
先生亦主此議縣尉談君蕙生捐錢百緡張玉軒司馬
龔哲臣孝廉董其事既成屬省記之按邑志張商英爲
王潛夫表云潛夫以非罪免官卒於里夫人向氏停柩
在堂執二子手泣曰汝曹不能有所成以白父冤復父
官誓不葬此柩也於是貞靜專祕擇名師教授二子庠
就試八行全備爲天下第一謂弟序曰吾弗隱誰奉吾
母汝弗仕誰光前志詔旌庠爲廉遜處士序以異材官
徽猷閣學士贈潛夫奉直大夫二子泣請於母曰今復
榮

縣志

卷三十四

藝文志

國朝文

五十九

而天下之爲人母者可以勸矣庠能爲孝子序能爲忠臣所以講教誠不外此顧庠序就學時一年十六一年十四耳講焉而不知教焉而不從此爲之母爲之師者所無可如何也而乃循途踐迹日邁月征成就卓卓如是觀於庠序而天下之爲人子者可以勸矣今者昇平如舊勝跡更新遊斯洞者聽溪聲之清絕覽山色之蒼然慨念前徽咸思學步其可忘賢士大夫表章文獻之功歟

騾嶺寺記

曾省三

榮邑東南一帶雖岡巒起伏而平行散緩無挺然特出之概茲山自榮黎蜿蜒而來摩雲聳漢俯看一切如指

榮縣志

卷三十四

藝文志

國朝文

六十

掌上紋四面石壁峭削攀躋殊難然自遙而望又覺藏蘊深秀不可名狀居此山麓者如侯公昆仲暨楊君調元而課徒山寺則謝君聘藍君瑾章皆名孝廉自甲寅歲與諸友風雨磨礪嘗留連不忍去噫以山之靈傑豈有所藉於人而是山以諸君寄榻之故彌覺增重抑所謂人力更勝歟顧自諸人以前其有託於茲山者率泯滅無稽則夫滄桑遞變諸人之稱不稱未可知也而是山猶巋然獨存則人固弗能與山爭勝矣嗚呼山安可不傳 咸豐六年丙辰秋九月

張公殉難記

邑舉人 劉炳勛

公諱萬祿字錫齋蜀成都人以將家子歷任夔巫都戎
善待士卒故所向用命咸豐間出征楚皖有功 欽賜
捍勇巴圖魯授副將銜衛宿松太湖時民尤德公建生
祠以祀庚申春滇逆寇川由犍擾榮盤踞兩廠適公省
親歸里制府曾檄令剿賊公率親兵五百來邑所至秋
毫無犯雖古名將節制之師不是過也先公辦賊者多
逗留不進公於二月十二日抵榮駐軍浸水圯旋移營
逼賊壘十五夜賊突傾巢上竄公偵知急督所部追剿
截賊豹子山自辰至午斬首數百級賊伺公孤軍無援

榮

縣志

卷三十四

藝文志

國朝文

六十一

乃糾悍賊數千效官兵旗幟詐爲接應公轉戰益力身
受廿餘創猶奮臂戮數賊賊大至公躍馬突重圍殺聲
震天詎馬陷泥田疾呼曰吾得死所矣遂及於難同死
者三百餘人聞者莫不悲公之忠而太息痛恨於救援
之無人也殘卒殮公尸歸其櫬輿屍未盡者瘞之乙亥
冬邑人釀金崇其封環以石各樹豐碑並請於有司鑄
示以昭敬重時邑紳先已祠公城北因繪遺像入祀如
典禮方軍之沒也作壁上觀者猶以輕動訾公夫成敗
詎可論英雄乎當其出師擊賊期一舉而殲之及矢亡
援絕拚身敵愾炳焉與日月爭光如公者固難一二數

矣桓侯英勇睢陽忠烈今之古人哉光緒二年丙子仲冬月立石

修砦始末記

邑進士 曹俊亮

承平日久禍亂將興惟遠見者知之明亦防之預咸豐壬子俊留京師閱邸報不數月髮逆連陷數省吾蜀毗連楚豫恐不免池魚之殃因函致家甘泉學博倡修附近大才寺砦甫鳩工命匠而邑中天乙牛峰諸砦因之次第以舉卽鄰封數百里亦莫不聞風興起爭先踴躍爲保障計無何庸庸者造作浮言守土者又慮民皆遷砦城誰與守上下各懷疑忌蓋幾幾乎欲避禍而禍反

榮

縣志

卷三十四

藝文志

國朝文

六十二

更速焉加以董事者經理或未得人甲寅吾邑果首撻構訟之寃以致全省閩傳皆爲之停工觀望先因春三月俊消癸丑措貲假仍將刑部供職赴都由省至是羈延九閱月未去雖一誤資俸再誤改選弗暇計時西漚李司成奉命督辦川省團練亦相與議曰是役也關係生靈休戚匪輕如事不濟榮無論矣蜀亦危乎殆哉幸制府裕黃兩公卓識在胷鈞衡獨斷先後竟飭令發還軍械仍前修築完案蓋人心之惶惑無定民力之拮据弗遑者已閱二年於茲矣由是再作補牢之計傾者培之缺者完之屋宇蓬廬以庇身也糧儲井竈以贍生也

己未冬滇匪由敘倡亂而吾榮閭邑之砦適成庚申正賊犯貢廠遠近貧富居民先已移避入砦賊無所掠卽竄井研計自己未迄癸亥肅清中間賊雖絡繹往來而統核吾榮究未常有所損於大局懿乎鑠哉非砦之功何遽及此向使舉事弗先先事弗果將臨時倉皇無措草木皆兵吾恐滄海桑田當不可以意計欲求如此日之間井依然室家無恙也得乎今者大訟平矣大難定矣吾儕已出水火而登衽席矣然則三榮億萬家父子兄弟夫婦所由熙熙然相聚一堂而得享家人之樂事者又烏可忘其所自耶語云兵可百年不用不可一日不備若夫通斯意而爲未雨之綢繆是所望於後起之君子

麟岩砦記

邑北關外廿里許麟巖砦古梯子巖也近附鳳儀山秋月坪銅鑼頂佛耳巖四山環抱兩溪夾流足徵形勝咸豐己未滇逆竄蜀鄉人就山爲砦約費萬金山頂建公所顏曰全體堂崇隆高廠堂外豎字庫與鎮南塔遥遥鼎峙砦設四門左紫東右水西最後爲餘慶三面懸岩劈立千仞惟前砌石壁橫數十丈外浚深濠如天造地設中爲寶善門砦時須慎守之山畔鑿不二涵空梯雲

榮

縣志

卷三十四

藝文志

國朝文

六十三

西白四硿硿各四間可容白餘人居梯雲硿摩崖書清
空一氣極古老半岩建觀音廟外鑿蓮池如半月形左
爲文昌閣隱約林木樓閣架空八其間幽然無塵俗氣
右有龍泉清而腴周流不息石壁書龍泉二字勢如龍
蛇不可捉摸環山內外蒼松翠竹鳳舞龍吟往來遊憩
者直覺俗慮全消徘徊不忍去云

新建奎閣記

劉炳勛

城內鳳鳴山麓迤邐而右者毗連

聖廟東南隅乾隆中邑紳鄧錫綸等採青烏家言就其地建
奎閣一所以爲文星拱照必發巍科逮道光咸豐同治

榮縣志

卷三十四

藝文志

國朝文

六十四

初鄉榜較盛於前而登甲科者四人風水之說其信然
歟後有形家謂文星遠照尤利科名城外大佛山雄峙
象天馬採巽方挨辰坐角星二度重建一閣跨其上以
壯大觀時邑侯馬公力主此議無何以瓜代去謝公復
任又因工巨弗果建閱丙子邑紳白於攝篆徐公撥欸
千六百餘緡鳩工庀財砌石爲基垣以磚甃構傑閣三
重上祀魁神一董其役者茂才李龍驤邱維藻黃書藍
永光國學王士選六閱月而工竣屬炳記之夫事經前
人已成而後人再創一時雖若可緩而不得不汲汲焉
爲之者蓋期文風培植有以邁軌前人非泛然踵事而

增華也今斯閣矗立霄漢直萃萬山靈秀以拱衛三榮
其壯麗如人文之瑰琦其軒翥如人文之俊爽其崢嶸
聳峭如人文之傑出而超羣可謂文星四映駕舊閣而
上之矣顧士人幸生

文教昌明之世詩書禮樂絃誦於家而後酒醴笙簧貢登
於

國邑中諸先達其所以捷南宮成進士者皆自刻勵中來
然則科名之盛固有在矣豈徒視風水爲升降而沾沾
奎閣云乎哉 光緒三年初夏上浣穀旦